

Malawi Primary Education

Chichewa

Compiled by Nkhoma B

Buku la ophunzira
la Sitandade

4



0998603292
0882542313

Malawi Institute of Education

Malawi Primary Education

Chichewa

Buku la ophunzira
la Sitandade

4



Malawi Institute of Education

Reprinted with support from



Zamkatimu

Kuthokoza	v
MUTU 1 Malonje apamalonda	1
MUTU 2 Gwape ndi ana ake	5
MUTU 3 Kusamalira ziwiya	9
MUTU 4 Khumbo langa	13
MUTU 5 Kubwerezza zam'mbuvo ndi kuyesa ophunzira	18
MUTU 6 Khama ndi Tadala apita kumudzi	20
MUTU 7 Matenda a mgonagona	25
MUTU 8 Kufunika kobzala mitengo	30
MUTU 9 Dziko lachita chipalamba	35
MUTU 10 Kubwerezza zam'mbuvo ndi kuyesa ophunzira	39
MUTU 11 Kavalidwe koyenera	41
MUTU 12 Bwana wachitsanzo	47
MUTU 13 Kusamalira zipangizo zasukulu	50
MUTU 14 Edzi	54
MUTU 15 Kubwerezza zam'mbuvo ndi kuyesa ophunzira	59
MUTU 16 Fulu agwira kalulu	62
MUTU 17 Kufunika kwa maphunziro	67
MUTU 18 Kusunga ndalamaka kwamakono	71
MUTU 19 Kuchulukana	75
MUTU 20 Kubwerezza zam'mbuvo ndi kuyesa ophunzira	79
MUTU 21 Ulimi wamakono	81

MUTU 22	Zikhulupiriro zakale	86
MUTU 23	Mgwirizano wa njuchi	90
MUTU 24	Ndingathe	95
MUTU 25	Kubwerezza zam'mbuvo ndi kuyesa ophunzira	100
MUTU 26	Kupempha koyenera	103
MUTU 27	Zakudya zakasinthasinha	107
MUTU 28	Kusankha atsogoleri apasukulu	111
MUTU 29	Madandaulo a nkhalamba	115
MUTU 30	Kubwerezza zam'mbuvo ndi kuyesa ophunzira	119
MUTU 31	Kudzidalira pa chuma	121
MUTU 32	Phindu la ulimi wa ziweto	126
MUTU 33	Kubwerezza zam'mbuvo ndi kuyesa ophunzira	131

MUTU 1 Malonje apamalonda

Dziwani mawu awa

tchipitsa kweza chotsera kabweremawa



Banja la Bambo ndi Mayi Limbikani lidali ndi mwana dzina lake Takondwa. Mwanayu adali wolimbikira sukulu ndipo ankakhoza bwino m'kalasi.

Makolowo adaganiza zokamugulira Takondwa chikwama kuti azinyamuliramo mabuku popita

kusukulu. Mayi Limbikani adapita kumsika waukulu wam'derali wotchedwa Kanjiwa. Atafika kumsikako, adamva ogulitsa akuitanira malonda osiyanasiyana mofuula. Mmodzi mwa ogulitsawo adali a Chanza. Iwo adaitanira malonda motere: 'Kupeza zikwama zolimba! Zikwama zotsika mtengo zili pano!' Mayi Limbikani adatengeka mtima ndi kuitanirako ndipo adafika pamalondapo.

- | | |
|-----------------------|---|
| A Chanza | Ndakulandirani mayi. Muli bwanji? |
| Mayi Limbikani | Ndili bwino, kaya inu? |
| A Chanza | Inenso ndili bwino. Mundigula chiyani lero? |
| Mayi Limbikani | Ndikufuna chikwama choti mwana azikanyamuliramo mabuku popita kusukulu. |
| A Chanza | Zikwama zabwino mwazipeza pano. Sankhani chomwe mukufuna. |
| Mayi Limbikani | Ndakonda chofirachi.
Mukugulitsa ndalamu zingati? |
| A Chanza | Ndikutchipitsirani. Perekani K5,000.00 yokha. |
| Mayi Limbikani | Chikwamachi chadulatu.
Simungandichotseroko pang'ono? |

A Chanza	Musadandaule mayi. Chikwamachi si kabweremawa. Pamenepa ndakuganizirani.
Mayi Limbikani	Chakwera mtengo. Chonde, ndichotsereni pang'ono.
A Chanza	Chabwino, perekani K4,500.00 basi.
Mayi Limbikani	Zikomo bambo. Bola pamenepo.

Mayi Limbikani adagula chikwamacho ndi kubwerera kunyumba. Takondwa atalandira chikwama adathokoza makolo ake. Iye adakondwa kuti mabuku ake azisamalika.

Kuyankha mafunso

Yankhani mafunso otsatirawa kuchokera m'nhkani yomwe mwawerengayi.

- 1 Tchulani dzina la abambo a Takondwa.
- 2 N'chifukwa chiyani makolo a Takondwa adagula chikwama?
- 3 Tchulani zinthu ziwiri zimene ogula amayang'ana asadagule katundu.
- 4 Fotokozani kufunika koitanira malonda.
- 5 Kodi kunenerera malonda ndi koyenera kapena ayi? Fotokozani yankho lanu.

Ntchito A Kuchita sewero la pamalonda

Chitani sewero lolonjerana pogula ndi pogulitsa malonda pamsika.

Ntchito B Kuzindikira mayina

Dzina ndi mawu otchulira anthu, malo kapena chinthu cha moyo kapena chopanda moyo, chooneka kapena chosaoneka, chokhudzika kapena chosakhudzika.

Tsekani mzere kunsi kwa mayina m'ziganizo zotsatirazi.

Chitsanzo Takondwa ndi wolimbikira.


Yankho Takondwa ndi wolimbikira.

- 1 Iwo adagula chikwama chofира.
- 2 Malonda adayenda bwino.
- 3 Iye amalimbikira maphunziro.
- 4 Adaperekа ndalamа zambiri.
- 5 Tiyenera kusamala mabuku athu.

MUTU 2 Gwape ndi ana ake

Dziwani mawu awa

langiza kopeka lusa nyengerera



M'nkhalango yotchedwa Chimwavi mudali Gwape ndi ana ake asanu. Nthawi zambiri Gwape amachoka pakhomo kukafuna zakudya. Ankalangiza ana ake kuti asamatuluke m'nyumba iye akachoka. Amawalangizanso kuti azitseka chitseko pofuna kudziteteza ku nkhandwe yolusa yomwe imakhala m'nkhalangomo.

Tsiku lina Gwape ali kofuna zakudya, nkhandweyo idafika kunyumbako. Idagogoda pachitseko koma ana sadatsekule. Nkhandwe idayamba kuyankhula monyengerera anawo. Idawauza kuti idabweretsa maswiti, juwisi, mabisiketi, mtedza ndi zakudya zina zokoma. Anawo atamva izi adakopeka ndipo adatsekula chitseko kuti alandire zakudyazo.

Nkhandwe idalumphira anawo ndi kuwameza amoyo. Mwamwayi, mwana mmodzi adathawira m'khitchini. Gwape atabwera kuchokera kofuna zakudya kuja, adapeza kukhomo kuli pululu. Izi zidamudzidzimutsa kwambiri. Modera nkhawa adayamba kuitana anawo. Mwana yemwe adabisala m'khitchini uja adavomera kuitanako. Iye adafotokoza zomwe zidachitika.

Mokhumudwa, Gwape ndi mwana wake adayamba kufunafuna nkhandweyo. Mwamwayi, adapeza ili mtulo tofa nato, ikuliza mkonono pansi pamtengo. Gwape adadziwa kuti uwu udali mwayi wake woti athane nayo. Adatenga lumo ndi kuing'amba pamimba.

Atatero, adatulutsa ana aja ali amoyo. Apo Gwape ndi ana ake adalumpha ndi chisangalalo chachikulu. Adauza anawo kuti aliyense atenge mwala umodzi waukulu mwansanga ndi kuika m'mimba mwa nkhandweyo. Ataika, adatenga singano ndi ulusi ndi kusoka pamimbapo. Gwape ndi ana ake adabwerera kwawo mosangalala.

Nkhandwe itadzuka idamva ludzu. Iyo idaganiza zopita kumtsinje kukamwa madzi. Idayenda movutika chifukwa cha kulemera kwa miyala ija. Pamene inkati imwe madzi, idagwera mumtsinjemo ndikumira.

Kuyankha mafunso

- 1 Tchulani dzina la nkhango yomwe Gwape ndi ana ake ankakhala.
- 2 Ndi langizo lotani lomwe Gwape adapereka kwa ana ake?
- 3 N'chifukwa chiyani ana a Gwape adatsekula chitseko?
- 4 Fotokozani momwe Gwape adaikhaulitsira nkhandwe.
- 5 Kodi ubwino womvera malangizo ndi wotani?

Ntchito A **Kupereka matanthauzo a zilapi/ndagi**

Pezani matanthauzo a zilapi posankha mayankho awa.

**dzungu
minga**

**njira
chikope**

**mbatata
maso**

Chitsanzo Mbalame ziwiri zaoloka nyanja.

Yankho maso

- 1 Diwa lam'nsenjere kugwaigwa.
- 2 Nyumba yapsa, mtanda watsala.
- 3 Miphika yaphulana.
- 4 Ndodo yaamfumu siiwongoleka.
- 5 Mphasa ndili nazo koma ndimagona pansi.

Ntchito B **Kuzindikira a lowam'malo**

Mlowam'malo ndi mawu amene a maimira dzina.

Tsekani mzere kunsi kwa a lowam'malo m'ziganizo zotsatirazi.

Chitsanzo Ine ndimamvera makolo akamandilangiza.

Yankho Ine ndimamvera makolo akamandilangiza.

MUTU 3 Kusamalira ziwiya

Dziwani mawu awa

kwecha

nsengwa

cheyo

thandala



Ziwiya ndi zipangizo zimene timagwiritsa ntchito pakhomo. Pali njira zosiyanasiyana zosamalira ziwiya. Ziwiya zophikira monga mapoto tiyenera kuzikwecha ndi mchenga kapena phulusa. Mbale ndi mabeseni tizitsuke ndi sopo ndi madzi oyera bwino. Tikatha kutsuka, tiziyanike pa thandala kuti ziume bwino. Kenaka tzipukute ndi kansalu koyera ndi kuzisunga pamalo abwino.

Palinso ziwiya zomwera monga makapu, zipanda ndi zikho. Izinso tiyenera kuzitsuka, kuzipukuta ndi kuziika pamalo abwino monga m'kabati. Tikatsuka mafoloko, mipeni ndi supuni tizipukute kuti zisachite dzimbiri. Zimenezinso tizisunge pamalo pabwino.

Ziwiya monga madengu ndi malichero tiyenera kuzitsuka ndi cheyo. Kenaka tiziyanike kuti ziume. Zikauma, tiyenera tizisunge pamalo pabwino.

Kusasamala ziwiya zapakhomo ndi koopsa chifukwa kumabweretsa ntchentche ndi mphemvu. Ntchentche zimatera pa zakudya zotsala m'ziwiya. Zotsatira zake ndi zoti anthu amadwala kawirikawiri matenda otsekula m'mimba. Amadwalanso matenda ena omwe amayamba chifukwa chosasamalira ziwiya. Kotero, tizisamala ziwiya pofuna kupewa matenda osiyanasiyana.

Kuyankha mafunso

Yankhani mafunso otsatirawa kuchokera m'nhani mwawerengayi.

- 1 Perekani ntchito zitatu za ziwiya kuchokera m'zomwe mwawerenga m'nhaniyi.
- 2 Kodi mapoto ndi miphika tingazisamalire bwanji?
- 3 N'chifukwa chiyani timayenera kupukuta ziwiya zikauma.

- 4 Fotokozani kuopsa kosunga ziwiya zosatsuka.
- 5 Mungapewe bwanji matenda omwe amadza chifukwa cha uve?

Ntchito A Kulemba ndondomeko yosamalira ziwiya

Lembani ndondomeko yosamalira ziwiya mu mabokosi ali m'munsimu.

Ndondomeko yosamalira ziwiya.

Ziwiya zophikira	Ziwiya zomwera
1 Kukwecha ndi mchenga	1
2 Kutsukuluza ndi madzi	2
3 Kuyanika pathandala	3
4 Kusunga pamalo abwino	4

Ntchito B Kuzindikira mayina amwinimwini

Dzina lamwinimwini ndi dzina lotchulira kapena loitanira chinthu. Dzinali limayamba ndi lembo lalikulu.

Tsekani mzere kensi kwa mayina amwinimwini m'ndime yotsatirayi.

Chitsanzo Pamudzi pa a Penda padali paukhondo.

Yankho Pamudzi pa a Penda padali paukhondo.

Iwo adali ndi ana awiri, Dalo ndi Limbani. Dalo adali wamkazi pamene Limbani adali wamwamuna.

MUTU 4 Khumbo langa

Dziwani mawu awa

khumba mchikumbe namwino mtolankhani



Ndikhumba ine
Kukhala mphunzitsi
Ndizidzasula ophunzira
Nditavala mogometsa
Kunyadira ntchito yanga

Ndikhumba ine
Kukhala msirikali
Ndizidzateteza dziko lathu
Kuguba nditavala yunifomu
Kunyadira ntchito yanga

Ndikhumba ine
Kukhala mchikumbe
Ndizidzakolola zochuluka
Mbewu zanga zili m'manja
Kunyadira ntchito yanga

Ndikhumba ine
Kukhala namwino
Ndizidzathandiza odwala
Zovala zoyer a ngati akakowa nditavala
Kunyadira ntchito yanga

Ndikhumba ine
Kukhala mtolankhani
Ndizidzafufuza nkhani
Nditatchena mochititsa kaso
Kunyadira ntchito yanga


Kuyankha mafunso

Yankhani mafunso otsatirawa kuchokera
m'ndakatulo mwawerengayi.

- 1 N'chifukwa chiyani woyankhula m'ndime yoyamba amafuna kudzakhala mphunzitsi?
- 2 Kodi woyankhula m'ndime yachiwiri amakhumba ntchito yanji?
- 3 Kodi namwino amagwira ntchito yanji?
- 4 N'chifukwa chiyani mchikumbe amayenera kuvala jombo?
- 5 Fotokozani khumbo lanu ndi zifukwa zake.

Ntchito A Kulemba ntchito zomwe dalaivala amagwira

Lembani ntchito zomwe dalaivala amagwira m'mabokosi mosalembewa.



Ntchito B Zizindikiro zam'kalembewe

Mpumiro (.) ndi chizindikiro chomwe timachiika kumapeto kwa chiganizo.

Mpatuliro (,) ndi chizindikiro chomwe chimasonyeza kupatula zinthu zomwe zili mu mndandanda.

Mfunsiro (?) ndi chizindikiro chomwe timachiika poothera pa chiganizo chomwe ndi funso.

Ikani mpumiro, mpatuliro kapena mfunsiro pamalo oyenera m'ziganizo zotsatirazi.

Chitsanzo A Chibwe amagulitsa chimanga mpunga ndi nyemba

Yankho A Chibwe amagulitsa chimanga, mpunga ndi nyemba.

- 1 Kudimba kwathu kuli mnkhaka mnkhwani ndi bonongwe
- 2 Aphunzitsi athu amalimbikira ntchito
- 3 Makolowo adagula mabuku makope ndi mapensulo
- 4 Kodi mtolankhani amacheza ndi yani
- 5 Nyama zimakhala m'nkhala

MUTU 5 Kubwereza zam'mbuyo kuyesa ophunzira

Ntchito A Kutsiriza ziganizo

Tsirizani ziganizo zotsatirazi ndi mawu awa.

mabuku
phunziro

amalemekeza
thandala

mchenge
ziwiya

Chitsanzo M'khitchini timagwiritsa ntchito _____.

Yankho M'khitchini timagwiritsa ntchito ziwiya.

- 1 Ana abwino _____ akulu.
- 2 Ife timakonda _____ la Chichewa.
- 3 Tikatsuka mbale timayanika pa _____.
- 4 Tiyenera kukutira _____ kuti azisamalika.
- 5 Timagwiritsa ntchito _____ pokwecha mapoto.

Ntchito B Kupeza mawu m'bokosi

Pezani mawu osachepera asanu kuchokera m'bokosi la malembo.

Chitsanzo jomba

n	t	h	a	w	i	m
a	c	h	o	t	s	a
m	b	i	y	a	m	!
w	a	j	o	m	b	a
i	n	a	b	u	h	t
n	j	u	t	a	r	a
o	a	p	a	n	o	k
g	w	a	d	a	n	i

Ntchito C Kuzindikira mayina

Tsekani mzere kunsi kwa mayina m'ndime
yotsatirayi.

Chitsanzo Iye wagula mango.

Yankho Iye wagula mango.

Mayi Limbikani adapita kumsika waukulu wam'derali
wotchedwa Kanjiwa. Atafika kumsikako, adamva
ogulitsa akuitanira malonda mofuula.

MUTU 6 Khama ndi Tadala apita kumudzi

Dziwani mawu awa

nankafumbwe nkhumbwa phaka mphwephwo



Khama ndi Tadala amakhala kutauni ndi makolo awa. Atatsekera sukulu, adapita kumudzi. Iwo adapeza agogo awo atakolola chimanga, nyemba, mbatata ndi soya. Anawa adachita chidwi ndi zokolola zochuluka zomwe agogowo adali nazo. Iwo adapempha agogo kuti awafotokozere momwe amasamalira zokolola.

- Tadala** Kodi agogo, mukuchita chiyani pamenepa?
- Agogo** Mwanawe, ndikusankha mbewu.
- Khama** Zokolola zochuluka chotere mumazisamala bwanji?
- Agogo** Pali njira zosiyanasiyana zosamalira zokolola. Tikakolola chimanga timachisankha. Chimanga chikuluchikulu timachiika m'nhokwe yomwe ili paphaka lolimba. China timachitonola ndi kuchithira mankhwala kuti anankafumbwe asachiononge. Tikatero timachithira m'matumba ndi kuchiika pamalo pabwino. Nkhumbwa zonse timatonola pazokha ndikukagayitsa. Mtedza nawonso tikakolola timausankhula ndikuchotsako mphwephwa.
- Tadala** Kodi agogo, nkhumbwa ndi chiyani?
- Agogo** Wafunsa bwino Tadala. Nkhumbwa ndi chimanga chosakhwima bwino ndipo chimakhala ndi zitsononko zing'onozing'ono.
- Khama** Agogo, mwafotokoza za mankhwala oteteza chimanga. Kodi mankhwalawo mumawapeza bwanji?

- Agogo** Timagula mankwalawo kumalo ogulitsira zipangizo zaulimi. Pothira mankhwala, timatsatira malangizo omwe amalembedwa pa chikutiro cha mankhwalawo. Nthawi zina timathira phulusa.
- Tadala** Aaa! Agogo, mpaka phulusa?
- Agogo** Eya mwanawe. Phulusa timathira zokolola monga nyemba ndi mbatata.
- Khama** Agogo, munatchulanso za mphwephwa. Kodi mphwephwa n'chiyani?
- Agogo** Wafunsa bwino. Mphwephwa ndi mtedza wofota chifukwa chosakhwima bwino.
- Tadala** Agogo, tathokoza. Tikabwerera kutauni, tikawafotokozena anzathu zomwe taphunzira.
- Kumudzi kuja anawa adaphunzira zambiri ndipo adabwerera kutauni ali osangalala.

Kuyankha mafunso

Yankhani mafunso otsatirawa kuchokera m'nhani mwawerengayi.

- 1 Kodi Khama ndi Tadala adakachita chiyani kumudzi?
- 2 Kodi agogo amalima mbewu zanji?
- 3 Perekani njira ziwiri zomwe agogo amasamalira zokolola.
- 4 N'chifukwa chiyani timayenera kutsatira malangizo pothira mankhwala?
- 5 Fotokozani momwe anthu am'dera lanu amasamalira zokolola.

Ntchito A Kusanja ziganizo

Sanjani ziganizo zotsatirazi m'ndondomeko yoyenera.

- 1 Iwo amasankha chimanga chikuluchikulu.
- 2 Matumbawo amawaika pamalo osamalika.
- 3 Agogo amakolola chimanga chochuluka.
- 4 Amachithira mankhwala kuti anankafumbwe asachiononge.
- 5 Amaika chimangacho m'matumba.

Ntchito B Kupereka mawu ofanana m'matanthauzo

Perekani mawu ofanana m'matanthauzo ndi mawu omwe ali ndi mzere kunsi kwawo m'ziganizo zotsatirazi.

Chitsanzo Ana amakonda kudya nsawa.

Yankho Ana amakonda kudya mtedza.

1 Mbatata timaithira chipala tisanaike pankhuti.

2 Lekeni waphika mbwanda zoyeru.

3 Agogo agula mbwani.

4 Lero tikadyera mtoliro.

5 Tisanathire mbewu musaka, tiwazemo mankhwala


MUTU 7 Matenda amgonagona

Dziwani mawu awa

mgonagona

thamanga

khansa



Kanjinga adali katswiri wamasewera ampira. Dzinali adamupatsa ndi anthu kaamba ka liwiro lake akamasewera mpira. Tsiku lina atangolowa m'bwalo, anthu adamuchemerera kuti, 'Kanjinga! Kanjinga! Kanjinga!' Mnyamatayu adadzazidwa ndi chimwemwe chachikulu. Chifukwa cha chimenechi mtima wake udayamba kugunda kwambiri.

Mwadzidzidzi, Kanjinga adagwa pansi ndi kukomoka Anzake adamutengera kuchipatala. Mnzake wina adakadziwitsa mayi ake, a Nangozo.

A Nangozo atafika kuchipatalako, adapeza adokotalo akupima Kanjinga. Adokotala adamupeza ndi matenda othamanga magazi. Iwo adamupatsa mankhwala. Amayi ake adafunsa chomwe chimayambitsa matenda othamanga magazi.

Adokotalawo adati matendawa amayamba ngati munthu adya zakudya zamchere wambiri kapena zamafuta ochuluka. Matendawa ndi amodzi mwa matenda amgonagona. Iwo adalangiza Kanjinga kuti asamadye zakudya zamchere ndi zamafuta ambiri.

Adafotokozanso kuti sayenera kukhumudwa kapena kukondwa kwambiri. Adati kukondwa kapena kukhumudwa kwambiri kumachititsanso magazi kuthamanga. Adatinso matenda amgonagona amatenga nthawi yitali munthu akudwala. Adatchulanso matenda ena amgonagona monga a shuga, khansa, chifuwa chachikulu, edzi ndi khunyu.

Dokotalayo adamulimbikitsa Kanjinga kuitiriza kuchita masewera kuti akhale ndi moyo wathanzi.

Atapeza bwino adamutulutsa m'chipatala ndipo adabwerera kwawo. Kanjinga adalimbikitsa anzake za kufunika kochita masewera olimbitsa thupi.


Kuyankha mafunso

Yankhani mafunso otsatirawa kuchokera m'nhani mwawerengayi.

- 1 Kodi Kanjinga ankadziwika kwambiri ndi chiyani?
- 2 N'chifukwa chiyani adokotala adapima Kanjinga?
- 3 Perekani njira ziwiri zopewera matenda amgonagona.
- 4 N'chifukwa chiyani matenda othamanga magazi amatchedwa amgonagona?
- 5 Ndi zakudya ziti zomwe tiyenera kumadya pofuna kupewa matenda othamanga magazi?

Ntchito A Kufotokoza mpangankhani

Lembani ntchito zomwe dokotala akugwira munkhani yomwe mwawerengayi. Onani chitsanzo chaperekedwa pa nambala 1 m'munsimu.



Ntchito B Kuzindikira a lowam'malo

Mlowam'malo ndi mawu amene a maimira dzina.

Sinthani a lowam'malo omwe ali ndi mzere
kunsi kwawo kuti akhale mu zambiri m'ziganizo
zotsatirazi.

Chitsanzo Ine ndiyenda pa galimoto.

Yankho Ife tiyenda pa galimoto.

- 1 Iye wapita ku chipatala.
- 2 Aphunzitsi akuitana iwe.
- 3 Uyu amachita masewera olimbitsa thupi.
- 4 Kodi iwe umadya zakudya zamagulu onse?
- 5 Ine ndili bwino.

MUTU 8 Kufunika kobzala mitengo

Dziwani mawu awa

mbande bzala mgwere m' mphepete sautsa



Sukulu ya Tadziwa idali m'dera la Chiwale.
Pasukulupa padali mitengo yochepa. Aphunzitsi
ndi ophunzira ankavutika ndi mphepo yamkuntho
komanso duwa.

Kaamba ka mavutowa, anthu ozungulira sukuluyi
ndi aphunzitsi adagwirizana zobzala mitengo.
Adafesa njere za mitengo ya zipatso monga gwafa,

malanje ndi mango. Adafesanso njere za mitengo yachilengedwe monga m'bawa, mlombwa ndi chitimbe. Ntchito yofesa njere idachitika m'nyengo yachilimwe.

Dzinja litafika, aphunzitsi, ophunzira ndi makolo adabzala mitengo pasukuluyi. Adagwira ntchitoyi m'magulu. Gulu loyamba lidabzala mitengo yazipatso. Gulu lachiwiri lidabzala mitengo yomwe si yazipatso. Gulu lina lidakumba mgwere wopatutsira madzi m'mphepete mwa sukuluyi kuti asakokolole mbande zomwe adaokera.

Anthuwa atamaliza ntchitoyi, adakhazikitsa malamulo kuti mitengoyo itetezedwe. Mfumu yaikulu yam'derali idathokoza anthu onse chifukwa chogwira ntchito mwamgwirizano. Idawalimbikitsa kuti akabzale mitengo m'midzi mwawo.

Patapita zaka zingapo, sukulu ya Tadziwa idali ndi mitengo yochuluka. Mphepo yamkuntho ndi dzuwa zidasiya kusautsa. Mithunzi siinkasowa. Kamphepo kayaziyazi kanali kuomba kuchokera m'mitengoyo. Mitengoyo idachititsa kuti sukulu ya Tadziwa ikhale chitsanzo chokoma m'dera lonselo pobwezeretsa chilengedwe.


Kuyankha mafunso

Yankhani mafunso otsatirawa kuchokera m'nhani yomwe mwawerengayi.

- 1 Kodi sukulu ya Tadziwa idali m'dera liti?
- 2 N'chifukwa chiyani anthu adagwirizana zobzala mitengo?
- 3 Perekani mitundu ya mitengo yomwe adabzala pa sukulu ya Tadziwa.
- 4 N'chifukwa chiyani mitengo ili yofunika m'dera lanu?
- 5 Fotokozani ubwino wogwirizana pogwira ntchito.

Ntchito A Kufotokoza zotsatira zakusowa kwa mitengo

Lembani zotsatira za kusowa kwa mitengo.



Ntchito B Kuzindikira afotokozi

Mfotokozi ndi mawu amene amanena za dzina kapena mlowam'malo.

Tsekani mzere kensi kwa afotokozi m'ziganizo zotsatirazi.

Chitsanzo Ndamanga nyumba yaikulu.

Yankho Ndamanga nyumba yaikulu.

- 1 Amayi avala malaya okongola.
- 2 Melifa wadya mango akupsa.
- 3 Pasukulupa pali mitengo yambiri.
- 4 Ife timavala yunifomu yobiriwira.
- 5 Ophunzira olimbikira amakhoza mayeso.


MUTU 9 Dziko lachita chipalamba

Dziwani mawu awa

chipalamba

ng'amba

chinyontho



Dziko lachita chipalamba

Mitengo yochuluka yatha psiti

Pootcha makala ndi kucheka matabwa

Ha! Nyengo tasinthadi

Dziko lachita chipalamba
Udzu ndi mitengo yatheratu
Nacho chinyontho m'nthaka chathawa
Ha! Nyengo tasinthadi

Dziko lachitadi chipalamba
Nyama m'tchire zathamo
Poti tchire tatha n'kutentha
Ha! nyengo tasinthadi

Dzikotu lachita chipalamba
Ng'amba yasautsa ponseponse
Poumitsa zonse zomera
Ha! nyengo tasinthadi

Tonse manja tigwirane
Kudula mwachisawawa mitengo tisiye
Kuotcha makala tileke
Poti dziko lachitadi chipalamba

Kuyankha mafunso

Yankhani mafunso kuchokera m'ndakatulo
mwawerengayi.

- 1 Kodi chidatha mitengo yochuluka n'chiyani?
- 2 N'chifukwa chiyani nthaka idauma?

- 3 Fotokozani chomwe chidathawitsa nyama zam'tchire.
- 4 Fotokozani zomwe mungachite pobwezeretsa chilengedwe.
- 5 Kodi ubwino wogwirana manja popewa chipalamba ndi wotani?

**Ntchito A Kupereka mawu ofanana
m'matanthauzo**

Pezani mawu ofanana m'matanthauzo ndi mawu awa.

vutitsa
chinyezi

theratu
leka

thengo
phiri

Chitsanzo gomo

Yankho phiri

- | | |
|--------------|-------|
| 1 chinyontho | _____ |
| 2 siya | _____ |
| 3 tchire | _____ |
| 4 psiti | _____ |
| 5 sautsa | _____ |

Ntchito B Kuzindikira aneni

Mneni ndi mawu onena ntchito yochitika
m'chiganizo.

Tsekani mzere kensi kwa aneni m'ziganizo
zotsatirazi.

Chitsanzo Ife tibwezeretse chilengedwe.

Yankho Ife tibwezeretse chilengedwe.

- 1 Dziko lachita chipalamba.
- 2 Anthu asamadule mitengo.
- 3 Nyama zam'tchire zidatha.
- 4 Masiku ano nyengo yasinthia.
- 5 Tonse tigwirane manja.

MUTU 10

Kubwereza zam'mbuyo
ndi kuyesa ophunzira

Ntchito A Kupereka mawu ofanana
m'matanthauzo

Perekani mawu ofanana m'matanthauzo ndi mawu awa.

Chitsanzo ziweto

Yankho zifuyo

1 chipupa

2 atsibweni

3 mbwanda

4 chiwala

5 katungwe

Ntchito B Kutsiriza zifanifani/ntchedzero

Tsirizani zifanifani zotsatirazi ndi mawu awa.

fisi
kalulu

mavu
uchi

nyenyezi
phwetekere

Chitsanzo Kuwala ngati _____.

Yankho Kuwala ngati nyenyezi.

1 Kufiira ngati _____.

2 Kutsekemera ngati _____.

3 Kumvana ngati _____.

4 Kuchenjera ngati _____.

5 Nkhuli ngati _____.

Ntchito C Kuzindikira aneni

Tsekani mzere kunsi kwa *aneni* m'ziganizo zotsatirazi.

Chitsanzo Pamela waphika nsima.

Yankho Pamela waphika nsima.

1 Maliya wapita kusukulu.

2 Amina ndi Yosefe amalimbikira maphunziro.

3 Sakina, bwera kuno.

4 Ndani walima apa?

5 Ife timalemekeza aphunzitsi.

MUTU 11 Kavaldwe koyenera

Dziwani mawu awa

makedzana

nyanda

ndekesha



Gogo Najere amakhala pamudzi wa a Chiwaya.
Agogowa adali ndi mwana wamkazi amene amakhala
kutauni. Tsiku lina, agogowa adapita kutauni
kukacheza ndi adzukulu awo, Tamanda ndi Pempho.
Atafika kutauni, adzukuluwo adawalandira.

- Pempho** Takulandirani agogo. Mwayenda bwanji?
- Gogo** Zikomo mwanawe. Ine ndayenda bwino, koma zomwe ndaona m'basi zandikhumudwitsa.
- Pempho** Mwaonanji agogo?
- Gogo** Ha! Lekani ananu. Ndaona mnyamata wina atavala buluku mokhwefula. Iyeyo anali ndi mtsikana yemwe anavala ndekesha.
- Pempho** Ndekesha ndiye chiyani agogo?
- Gogo** Wafunsa bwino Pempho. Ndekesha ndi chovala cha munthu wamkazi, chachifupi ndi choonetsa ntchafu.
- Tamanda** Agogo, akuti kumenekotu ndiko kuvala kwamakono.
- Gogo** Ayi ndithu, adzukulu anga. Mavalidwe amenewo ndi osayenera konse. Zikomo kuti inuyo mumavala modzilemekeza.
- Tamanda** Agogo, kodi anthu akale ankavala momwe tavalira ifemu?
- Gogo** Ayi mwanawe. Makedzana, sizidali chonchi. Kalelo anthu ankavala

	zikopa kapena nyanda chifukwa kudalibe nsalu.
Tamanda	Nanga nyanda ndi chiyani agogo?
Gogo	Wafunsa bwino. Nyanda idali chovala chopangidwa ndi luzi. Dzina lina la nyanda ndi nkhwende.
Tamanda	Zikomo agogo. Taphunzira zambiri.
Pempho	Agogo, ife tipitiriza kuvala modzilemekeza kuti tikhale chitsanzo chabwino kwa anzathu.
Tamanda	Tizilimbikitsanso anzathu kuti azivala moyenera.

Atatha kucheza, Pempho ndi Tamanda adapita
kukhitchini kukathandiza amayi awo kuphika
chakudya.

Kuyankha mafunso

Yankhani mafunso otsatirawa kuchokera m'nhani
mwawerengayi.

- 1 Kodi Pempho ndi Tamanda amakhala kuti?
- 2 Kodi Agogo adakachita chiyani kutauni?
- 3 N'chifukwa chiyani agogo adakhumudwa ndi
zomwe adaona m'basi?

- 4 N'chifukwa chiyani tiyenera kuvala modzilemekeza?
- 5 Fotokozani maganizo anu pa kavalidwe koyenera.

Ntchito A Kupanga ganizo potsatira umboni

Pangani ganizo potsatira umboni wochokera mu nkhani ndi zomwe mukudziwa kale m'mabokosi otsatirawa.

		
Umboni wochokera mu nkhani	Zomwe ndikudziwa kale	Ganizo lomwe ndapanga
Gogo Najere adapita kutauni kukaona adzukulu awo.	Anthu okondana amayenderana.	Gogo Najere ankakondana ndi adzukulu awo.
Pempho ndi Tamanda adawalandira bwino agogo awo.	Banja laulemu limalandira bwino alendo.	
Pempho ndi Tamanda adavala modzilemekeza.	Ana amakhalidwe abwino amavala modzilemekeza.	
Pempho ndi Tamanda adathandiza amayi awo kuphika.	Anthu pabanja amathandizana ntchito.	

Ntchito B **Kuzindikira aneni anthawi yatsopano**

Mneni wanthawi yatsopano amasonyeza kuti ntchiti, yachitika, ikuchitika, ichitika komanso imachitika.

Tsekani mzere kunsi kwa aneni osonyeza nthawi yatsopano m'ziganizo zotsatirazi.

Chitsanzo Agogo akupita kutauni.

Yankho Agogo akupita kutauni.

- 1 Gogo Najere amakhala pamudzi wa a Chiwaya.
- 2 Amayi aphika chakudya.
- 3 Onse adya mosangalala.
- 4 Tamanda wafunsa funso labwino.
- 5 Adzukulu awo amavala modzilemekeza.

MJTU 12 Bwana wachitsanzo

Dziwani mawu awa

upangiri

omba

phwanya



Wezi adachita maphunziro kukoleji yotchedwa Luntha. Maphunzirowo adali okhudza kuyang'anira anthu ogwira ntchito. Atatsiriza maphunzirowo, adoyamba ntchito pakampani yoomba nsalu.

Kampaniyi idali ndi antchito ambiri. Mabwana apakampaniyi adalibe tsankho kwa anthu ogwira ntchito. Iwo sankasiyanitsa pogawa ntchito kuti uyu ndi wamkazi kapena wamwamuna.

Wezi ankagwira ntchito yoyang'anira gulu la anthu lomwe linkaomba nsalu. Iye ankaonetsetsa kuti nsalu zimene gululi linkaomba zikhale zooneka bwino. Anthu ena akaphwanya malamulo pantchito, Wezi ankawalangiza mwachikondi.

Wezi ankakonza ndondomeko yoti ogwira ntchito atsatire. Ankawalangiza momwe angagwirire ntchito. Wezi ankapereka upangiri kwa anthuwo. Izi zinkachititsa kuti ogwira ntchito aziomba nsalu zokongola ndi zochuluka pa nthawi yochepa. Bwana wamkulu adadalira Wezi chifukwa cha momwe ankagwirira ntchito.

Patatha zaka zochepa, Wezi adakwezedwa udindo. Iye adakhala woyang'anira kampani yonse ndipo malipiro ake adawawonjezera. Anzake omwe ankagwira nawo ntchito adamusirira kwambiri.

Kuyankha mafunso

Yankhani mafunso kuchokera m'nhani yomwe mwawerengayi.

- 1 Tchulani koleji yomwe Wezi adakachitira maphunziro ake.
- 2 Kodi Wezi ankagwira ntchito kukampani yanji?
- 3 N'chifukwa chiyani kampaniyi inkaomba nsalu zokongola?
- 4 Perekani chifukwa chimene Wezi adamukwezera pa udindo.
- 5 Mukadakhala bwana, mukadathandizira bwanji kutukula kampani?

Ntchito A Kuchita sewero

Chitani sewero la maudindo pa ntchito.

Ntchito B Kuzindikira mayina opanda mwinimwini

Dzina lopanda mwinimwini ndi lotchulira zinthu wamba.

Chitsanzo mwana

Pezani mayina opanda mwinimwini asanu kuchokera m'ndime yoyamba ya nhani yomwe mwawerenga.


MUTU 13 Kusamalira zipangizo zasukulu

Dziwani mawu awa

mveka

kathyali

khalidwe



Kudera lina kudali sukulu yomveka yotchedwa Lowani. Pasukulupo padali makalasi omangidwa mwaluso. Vuto lidali loti sukuluiyi idali ndi madesiki operewera. Ophunzira ambiri ankakhala pansi. Ngakhale izi zidali chomwecho, ophunzirawo ankasamalira bwino madesiki ochepa omwe adalipo. Akomiti yasukulu adapempha madesiki ku unduna wa zamaphunziro.

Tsiku lina, Unduna wa za Maphunziro, Sayansi ndi Luso udatumiza madesiki ndi mipando pasukulu ya Lowani. Izi zidasangalatsa aphunzitsi, akomiti a sukuluyo ndi ophunzira. Akomiti ya Sukulu adafika kudzathandiza kutsitsa katunduyo.

Aphunzitsi ndi akomiti adaitanitsa ophunzira onse ndi kuwalangiza ophunzirawo za kasamalidwe ka katunduyo.

Mphunzitsi wamkulu **adayamikira** ophunzira chifukwa chosamalira madesiki ochepa omwe adalipo. Adawauza kuti **asamakhwekhwerez** madesikiwo kupewa kuti angaonongeke. Adapitiriza kunena kuti **asamakwere** pa madesiki kapena kuwaimba ngati ng'oma.

Pomaliza, Wapampando wa Komiti **adapempha** wophunzira aliyense kuti akhale mlonda wa mnzake posamalira katunduyo. Ophunzira adamvetsera mwachidwi. Mtsogoleri wa ophunzira adalonjeza kuti **azisamalira** madesiki ndi mipandoyo. Adatinso, Wina aliyense woononga katundu wasukulu sadzamulekerera.

Kuyankha mafunso

Yankhani mafunso kuchokera m'nhani mwawerengayi.

- 1 Kodi pasukulu ya Lowani padali vuto lotani?
- 2 N'chifukwa chiyani akomiti ndi aphunzitsi adalangiza ophunzira?
- 3 Kodi akomiti amagwira ntchito yanji pasukulu yanu?
- 4 Fotokozani njira ziwiri zomwe mungasamalire madesiki.
- 5 Fotokozani kuipa koononga zipangizo zasukulu.

Ntchito A Kulemba chimangirizo

Lembani chimangirizo pamutu woti 'Kusamalira katundu wasukulu' motsatira malangizo awa.

- 1 Tchulani dzina la sukulu yanu.
- 2 Tchulani zipangizo zomwe zimapezeka pasukulu yanu.
- 3 Fotokozani momwe mumasamalira zipangizo mwatchulazo.

Ntchito B Kuzindikira alowam'malo aumwini

Mlowam'malo waumwini amaimira dzina losonyeza
umwini wa chinthu.

Tsekani mzere kunsi kwa alowam'malo aumwini
m'ziganizo zotsatirazi.

Chitsanzo Zanga zasowa.


Yankho Zanga zasowa.

- 1 Kodi chako wachisiya kuti?
- 2 Dzulo ndidanyamula zanga zokha.
- 3 Zathu zalowa kale m'khola.
- 4 Wakhoza bwino mayeso ndi wanu?
- 5 Lake lasowa pamene tinali kulima.

MUTU 14 Edzi

Dziwani mawu awa

yezetsa kasinthasinha mphwayi kusadumphitsa



Watizunza iwe edzi
Miyoyo yambiri wasakaza
Anyamata, atsikana, makolo
Mopanda chifundo wawatengadi
Ndiwe wotani edzi?

Ochita nawe chibwana

Kubwerekana mswachi, lumo ndi zingano

Ndithudi chimpwirikiti cha matenda adwala

Miyoyo yawo kumanda ukokera

Ndiwe wotani edzi?

Osayezetsa magazi kuchipatala

Odumphitsa mankhwala pakumwa

Osatsatira malangizo adokotala

Wathanzi moyo sangakhale nawo

Ndiwe wotani edzi?

Osadya zakasinthasinha

Osatsatira ndondomeko yodyera

Lopanda thanzi thupi likhala

Popeza mphwayi ndi mtolo

Ndiwe wotani edzi?

Kupalana nawe ubwenzi toto

Kuzolowerana nawe ndakana

Poti ambiri okutsata azunzika

Ndiwedi wosazolowereka

Ndiwe wotani edzi?


Kuyankha mafunso

Yankhani mafunso kuchokera m'ndakatulo yomwe mwawerengayi.

- 1 Kodi ndakatuloyi ikufotokoza za chiyani?
- 2 Tchulani njira ziwiri zomwe munthu *angatengere* edzi.
- 3 Fotokozani ubwino woyezetsa magazi.
- 4 Tchulani njira ziwiri zomwe munthu *angapewere* edzi.
- 5 Kodi mungamulangize zotani mnzanu *atapezeka* ndi kachilombo koyambitsa edzi?

**Ntchito A Kufotokoza njira zomwe
mungatsatire posamalira wodwala
edzi**

Lembani njira zosamalira munthu wodwala edzi. Onani chitsanzo chaperekedwa pa nambala 1 m'munsimu.



Ntchito B Kuzindikira afotokozi amaonekedwe

Mfotokozi wamaonekedwe amakamba za maonekedwe a chinthu.

Tsekani mzere kinsi kwa afotokozi amaonekedwe m'ziganizo zotsatirazi.

Chitsanzo Tagula nyemba zoyerā.

Yankho Tagula nyemba zoyerā.

- 1 Mbuzi ikudya msipu wobiriwira kwambiri.
- 2 Andipatsa chikwama chotuwa.
- 3 Ndagula cholembera chakuda chokha.
- 4 Anamwino amavala yunifomu yoyerā.
- 5 Ndavala kabudula wachikasu.

Ntchito A Sewero Iolemba mawu m'bokosi

Chitani sewero Iolemba mawu mopingasa ndi motsitsa kuchokera m'bokosi posankha mayankho ali m'munsiwa. Tsatirani langizo la funso lililonse.

Mopingasa sekerera, makedzana, phwanya

- 1 Mawu osonyeza kalekale (malembo 9)
- 2 Onetsa mano posonyeza kusangalala kwambiri (malembo 8)
- 3 Kuswa chinthu cholimba mwamphamvu (malembo 7)

Motsitsa nkhwayira, mswera, khalidwe


- 1 Mvula yowaza koma yosakata msanga (malembo 6)
- 2 Momwe munthu amakhala ndi anzake (malembo 8)
- 3 Nsapato yomwe chopondera chake chimakhala ndi zingwe zogwira phazi (malembo 9)

Chitsanzo mopingasa

Mawu osonyeza kalekale. (malembo 9)

Yankho

makedzana



Ntchito B **Kulemba chimangirizo**

Lembani chimangirizo pamutu woti 'Sukulu yathu' poyankha mafunso otsatirawa.

- 1 Kodi dzina la sukulu yanu ndi chiyani?
- 2 Nanga sukuluyi ili m'dera liti?
- 3 Kodi pasukulupo pali aphunzitsi angati?
- 4 Kodi pali aphunzitsi aamuna ndi aakazi angati?
- 5 Mphunzitsi wamkulu pasukulupo ndani?

Ntchito C **Kuzindikira alowam'malo**

Tsekani mzere kunsi kwa alowam'malo m'ziganizo zotsatirazi.

- 1 Kodi zanu mwatenga?
- 2 Ine ndimagulitsa nsomba zootcha.
- 3 Izi zilibé mawanga.
- 4 Kodi mtsikana uja ndani?
- 5 Tonse tabwera mofulumira.

MUTU 16 Fulu agwira Kalulu

Dziwani mawu awa

bwalo

nduna

mtudzu

chindapusa



M'nkhalango yotchedwa Tchuwi mudali nyama zambiri. Mfumu ya nyamazi idali Njovu. Mkango ndi Nswala zidali nduna za mfumu. Mudalinso mtsinje waukulu womwe udali ndi madzi ozizira bwino.

Chaka china kudagwa chilala ndipo mtsinjewu udauma. Mfumu Njovu itaona vutoli, idaitanitsa msonkhano ndipo nyamazi zidakambirana.

Mkango	Timverane! Takulandirani nonse. Tsopano tipemphe amfumu kuti atiyankhule.
Njovu	Zikomo chifukwa choti nonse mwabwera. Ndakuitanani kuti tikambirane momwe tingathetsere vuto la kusowa kwa madzi lomwe latigwerali. Kodi tichite chiyani?
Kalulu	Zikomo kumpando. Bwanji tikumbe chitsime?
Nyama zonse	Mawu! Mawu! Mawu! Mawu!
Nswala	Nanga yemwe sakumba nawo tidzachite naye chiyani?
Nyani	Ameneyo adzalandire chilango.
Nyama zonse	(M'manja, pwa! pwa! pwa!)
Njovu	Ine ndavomereza ndipo ndasangalala kuti tapanga lamulo limeneli.

Tsiku lokumba chitsime litafika, nyama zonse
zidabwera kupatula Kalulu. Madzi adapezekwa ndipo
nyama zidasangalala. Zidagwirizana zolondera
chitsimecho mosinthana.

Kalulu adamva kuti pachitsimepo adaikapo mlonda. Iye adapeza nzeru kuti azimwa nawo madziwo. Akaika pachitsimepo, Kalulu anali kuwapatsa zakudya alondawo kenako ndikuwanjata. Akatero, ankamwa madzi. Nyama zina pobwera kuchitsimeko zinkapeza alonda atanjatidwa.

Fulu ataona izi, adadziperekakulondera pachitsimepo. Izi zidaseketsa nyama zambiri. Fulu sadasamale kumusekako. Fulu adadzimata phula pamsana n'kukakhala m'mbali mwa chitsimecho ngati mwala.

Kalulu atafika pachitsime, adaponda mwalawo ndi kumwa madzi. Pamene ankati azinyamuka, iye adaona kuti wamatira. Apa adadziwa kuti zinthu zamupira.

Nyama zina zitabwera, zidapeza kuti Kalulu wagwidwa. Zidamufunsa chifukwa chomwe ankamwera madzi pamene sadakumbe nawo chitsimecho. Kalulu adayankha mwamtudzu. Nyamazi zidakwiya naye ktero zinamunjata. Zidapita naye kubwalo la mfumu. Mfumuyo idamuzenga mlandu ndipo idamulipiritsa chindapusu

Kuyankha mafunso

Yankhani mafunso otsatirawa kuchokera m'nhani yomwe mwawerengayi.

- 1 Kodi mfumu ya nyama zakutchire idali yani?
- 2 N'chifukwa chiyani nyama zidakumba chitsime?
- 3 Ndi chifukwa chiyani nyama zidaseka Fulu.
- 4 Mukadakhala kuti ndinu Kalulu ndipo akugwirani, mukadatani?
- 5 Tchulani phunziro lomwe mwapeza m'nhaniyi.

Ntchito A Kulemba kalata

Lembani kalata kwa makolo yowadziwitsa za momwe maphunziro anu akuyendera, poyankha mafunso owa.

- 1 Kodi mumaphunzira maphunziro ati?
- 2 Nanga mumakonda maphunziro ati?
- 3 Perekani zifukwa zomwe mumakondera maphunzirowo.

Ntchito B Kuzindikira a lowam'malo oloza

Mlowam'malo woloza ndi mawu amene a maaimira dzina la chinthu chomwe chikulozedwa.

Tsekani mzere kunsi kwa a lowam'malo oloza m'ziganizo zotsatirazi.

Chitsanzo Tengani iyi.

Yankho Tengani iyi.

- 1 Tengani izo mundipatse.
- 2 Ndipita kusukulu ndi awa.
- 3 Iyo ndi yamakolo anga.
- 4 Ija ndi yatsopano.
- 5 Timasunga ndalamama umu.

MUTU 17 Kufunika kwa maphunziro

Dziwani mawu awa

ukadaulo

zizwa

ukachenjede



Banja la a Chamdothi lidali ndi mwana dzina lake Maliko. Bambo Chamdothi sankakhulupirira kuti maphunziro ndi ofunika. Pa chifukwa chimenechi sankafuna kuti mwana waho azipita kusukulu. M'malo mwake, ankafuna kuti Maliko aziwathandiza ntchito zakumunda. Akazi awo sankakondwera ndi khaliidwe limeneli.

Mayiwo ankamulimbikitsa Maliko kupita kusukulu. Atalemba mayeso a Sitandade 8, Maliko adamusankhira kusekondale. Maliko ankakhoza bwino maphunziro onse kusekondaleko. Chotsatira chake ndi chakuti Maliko adamusankhira kusukulu ya ukachenjede kukapitiriza maphunziro ake.

Atamaliza maphunziro aukachenjedewo, Maliko adayamba ntchito kubungwe loyang'anira za achinyamata. Iye ankagwira ntchito yake mwaukadaulo. Akuluakulu akuntchito adamupatsa nyumba yabwino ndi galimoto yoti aziyendera. Makolo ake atamva zimenezi adakondwera kwambiri.

Maliko adaitana makolo ake kuti akacheze nawo. Makolowo adapita kutauni. Iwo adazizwa kwambiri poona nyumba ndi galimoto zamakono zomwe Maliko adali nazo. Udali ulendo wopambana kwambiri kwa makolowo.

Maliko adatenga makolo akewo pagalimoto kukawaonetsa madera osiyanasiyana ochititsa chidwi. Pa nthawiyi iye adawagulira zinthu zochitits^a kaso. Bambo ndi Mayi Chamdothi adayamikira Maliko. Iwo adazindikira kuti maphunziro ndi ofunika.

Kuyankha mafunso

Yankhani mafunso otsatirawa kuchokera m'nhani mwawerengayi.

- 1 Tchulani mayina a makolo ake a Maliko.
- 2 Perekani chifukwa chomwe bambo a Maliko sankafunira kuti mwana waho aphunzire.
- 3 Kodi maphunziro adamupindulira bwanji Maliko?
- 4 Tsimikizani kuti Maliko adali mwana wabwino kwa makolo ake.
- 5 Kodi mukadakhala Maliko, mukadatani bambo anu atakukanizani kupita kusukulu?

Ntchito A Kutsiriza zifanifani

Tsirizani zifanifani/ntchedzero zotsatirazi posankha mawu awa.

mphaka
chitute

kalulu
makala

mavu
nsima

Chitsanzo Kupusa ngati _____.

Yankho Kupusa ngati nsima.

1 Wanzeru ngati _____.

2 Kuchenjera ngati _____.

3 Kuning'a pamimba ngati _____.

4 Kuyenda mopanda mdidi ngati _____.

5 Kuda ngati _____.

Ntchito B Kuzindikira aonjezi

Muongezi ndi mawu omwe amanena za mneni, mfotokozi kapena muongezi mnzake m'chiganizo. Tsekani mzere kansi kwa aonjezi m'ziganizo zotsatirazi.

Chitsanzo Iye amayenda mofulumira.

Yankho Iye amayenda mofulumira.

- 1 Mwana wapita kuseri kwa nyumba.
- 2 Tambala amalira mokweza.
- 3 Mwanayu mulangizeni mwachikondi.
- 4 Madalo amayankhula motsitsa mawu.
- 5 Amayi ayanika mphale pamphasa.

Kusunga ndalama kwamakono

Dziwani mawu awa

kondwa

chiwongoladzanja

limbikira



Anthus am'mudzi mwa a Kabotolo ankagwira ntchito molimbikira. Anthuwa ankapeza ndalama zochuluka koma sankadziwa kasungidwe koyenera ka ndalamazo. Ankasunga ndalama zawo m'mbiya, m'zitini, kukumbira pansi kapena kusungitsa kwa anzawo. Njira zimenezi zinkabweretsa mavuto ambiri. Anthu ambiri ankaberana ndalama. Zina zinkapsera m'nyumba kapena kudyedwa ndi makoswe.

Izi zinkadandaulitsa Mfumu Kabotolo. Mfumuyi idaganiza zoitanitsa mlangizi. Mlangizi ophunzitsa anthu za kasungidwe ka ndalama adabwera kudzaphunzitsa anthu am'mudzimo.

Mlangiziyo adafotokoza njira ziwiri zamakono zosungira ndalama. Iye adati, anthu amasungitsa ndalama zaho kunyumba zosungirako ndalama. Nyumbazi zimatchedwa mabanki. Mlangiziyo adapitiriza kuti kumabanki ndalama zimachuluka ndipo osungitsa amalandira chiwongoladzanja. Adanena kuti ndalama zosungidwa ku mabanki zimatetezedwa kwambiri.

Iye adauza anthuwo kuti ena amasunga ndalama zaho m'magulu. Maguluwa amatchedwa banki m'khonde kapena banki m'mudzi. Anthu amakongozana ndalama. Iwo amabweza ndalamazo ndi chiwongoladzanja chochepa. Kawirikawiri sipakhala wochita chinyengo chifukwa cha mgwirizano.

Mlangiziyo atamaliza kuyankhula, Mfumu Kabotolo ndi anthu onse adaomba m'manja. Iwo adakondwera ndi malangizo abwino omwe adamva. Anthu ena adayamba kusungitsa ndalama kubanki. Enanso adagwirizana zoyambitsa mabanki m'khonde. Anthu am'mudzimu adapindula kwambiri chifukwa cha kasungidwe ka ndalama kamakonoka. Iwo adayamikira mfumu yaho poitanitsa mlangizi.

Kuyankha mafunso

Yankhani mafunso otsatirawa kuchokera m'nhani mwawerengayi.

- 1 Kodi msonkhano wa kasungidwe koyenera ka ndalama udachitikira kuti?
- 2 Perekani njira ziwiri zakasungidwe ka ndalama koyenera.
- 3 Fotokozani ubwino wosungitsa ndalama ku mabanki.
- 4 Kodi mukuganiza kuti anthu am'mudzi mwa a Kabotolo adapindula bwanji ndi kasungidwe ka ndalama kamakono?
- 5 Perekani njira zomwe anthu am'dera lanu amagwiritsa ntchito pofuna kusunga ndalama.

Ntchito A Kulemba kalata

Lembani kalata kwa makolo kuwapempha zipangizo zophunzirira zomwe mukufuna poyankha mafunso awa.

- 1 N'chifukwa chiyani mwalemba kalatayi?
- 2 Tchulani zipangizo zophunzirira zomwe mukufuna kuti akugulireni.
- 3 Fotokozani zifukwa zomwe mukufunira zipangizozo.

Ntchito B Kuzindikira afotokozi

Tsekani mzere kunsi kwa afotokozi m'ziganizo zotsatirazi.

Chitsanzo Anthu ambiri adaomba m'manja.

Yankho Anthu ambiri adaomba m'manja.

- 1 Ena amasunga ndalama zochuluka m'mbiya.
- 2 Njirazi zimabweretsa mavuto ambiri.
- 3 Mlangizi adafotokoza njira yamakono yosungira ndalama.
- 4 Amaperekwa chiwongoladzanja chochepa.
- 5 Gululo limapeza ndalama zambiri.

MUTU 19 Kuchulukana

Dziwani mawu awa

zyoli

gombeza

umphawi

chisodzera



Kuchulukana tachulukanadi
Makanda ochuluka akubadwa
Chimwemwe m'banja chikula
Nthungululu amayi alulutira

Abambo chisangalalo chikula

**Kuchulukana n'kwabwinodi
Mwachangu ntchito itha
Ndi chigulu ipepuka
Chimunda chingakule bwanji
Masiku pang'ono chiyera**

**Kuchulukana n'koipadi
Galu wakuda pakhomo adutsa
Ana gombeza akokerana
Nsanza zikhala wirawira
Zipangizo zakusukulu zisowa**

**Makolo udindo alephera
Zyoli, asowa pogwira
Ntchito ziwasowa
Umphawi uwathetsadi nzeru
N'kuchita ufumu pa iwo**

**Udindo wolera ngwatонse
Kuchulukana tichepetse
Kukwatitsa achisodzera tileke
Ana maphunziro tiwalimbikitse
Kuti lokoma tisimbe**

Kuyankha mafunso

Yankhani mafunso otsatirawa kuchokera
m'ndakatulo yomwe mwawerengayi.

- 1 Kodi ndakatuloyi ikukamba za chiyani?
- 2 Perekani mavuto awiri omwe atchulidwa
m'ndakatuloyi.
- 3 Kodi makolo ali ndi udindo wanji pa ana awo?
- 4 N'chifukwa chiyani kuchulukana m'banja kuli
koipa?
- 5 Fotokozani kuipa kochulukana m'dera lanu.

Ntchito A Kupereka mawu otsutsana m'mathanthauzo

Perekani mawu otsutsana m'mathanthauzo ndi
mawu omwe ali ndi mzere kunsi kwavo m'ziganizo
zotsatirazi.

Chitsanzo Mwana wavala malaya.

Yankho Mwana wavula malaya.

- 1 Ana amanga thumba.
- 2 Bwera ngakhale watopa.
- 3 Tili ndi zovala zochuluka.
- 4 Ana akuseka.
- 5 Achimwene agona.

Ntchito B Kusintha aneni mu nthawi yakale

Mneni wa nthawi yakale amasonyeza kuti ntchito idachitika kale. Sinthani aneni omwe ali ndi mzere kunsi kwawo kuti akhale mu nthawi yakale.

Chitsanzo Mlimi wayankhula pawailesi.

Yankho Mlimi adayankhula pawailesi.

- 1 Ndalemba chimangirizo chabwino.
- 2 Maliya wadya nsima.
- 3 Mphunzitsi walangiza ophunzira zochapa yunifomu.
- 4 Mtolankhani akucheza ndi ophunzira.
- 5 Tagula nyumba yamakono.

Ntchito A Kutsiriza zifanifani/ntchedzero

Tsirizani zifanifani zotsatirazi ndi mawu awa.

nkhono
nkhosa

phwetekere
kalulu

uchi
nyerere

Chitsanzo Kuyenda mondondozana ngati _____.

Yankho Kuyenda mondondozana ngati nyerere.

- 1 Kuzuna ngati _____.
- 2 Kufatsa ngati _____.
- 3 Kufiira ngati _____.
- 4 Kuchenjera ngati _____.
- 5 Kuyenda pang'onopang'ono ngati _____.

Ntchito B Kupereka mawu otsutsana m'matanthauzo

Perekani mawu otsutsana m'matanthauzo ndi mawu otsatirawa.

Chitsanzo khanda

Yankho nkhalamba

- 1 mayi
- 2 mwaulesi
- 3 pita
- 4 lakwa
- 5 lokoma

Ntchito C Kuzindikira afotokozi

Tsekani mzere kunsi kwa afotokozi m'ziganizo zotsatirazi.

Chitsanzo Kwathu kuli nyumba yamalata.

Yankho Kwathu kuli nyumba yamalata.

- 1 Kusukulu tili ndi yunifomu yobiriwira bwino.
- 2 Adatilimira msewu waphula.
- 3 M'khola muli ng'ombe yonenepa kwambiri.
- 4 Andireya adagula makope ochuluka.
- 5 Midzi isanu yapindula ndi ulimi.

MUTU 21 Ulimi wamakono

Dziwani mawu awa

bzala chonde mwanaalirenji mleranthaka



A Chamdimba adali mlimi. Iwo ankabzala mbewu motsatira njira zaulimi wamakono. A Chamdimba ankawetanso zifuyo ndipo pakhomo pawo padali pa mwanaalirenji.

Tsiku lina mtolankhani wa wailesi adacheza ndi mlimiyu pa zaulimi wake.

Mtolankhani Muli bwanji bambo?

Mlimi Ndili bwino.

Mtolankhani Nanga dzina lanu ndani?

Mlimi Dzina langa ndine Chamdimba.

Mtolankhani Inutu mumadziwika kwambiri chifukwa cha ulimi. Tafotokozani zomwe mumalima.

Mlimi Zikomo chifukwa chondipatsa mwayi wotere. Ndimalima ndiwo zamasamba, chimanga, nyemba, mpunga ndi mbatata. Ndimakolola zochuluka zaka zonse.

Mtolankhani Mumakolola zochuluka ngakhale kutagwa chilala? Kodi chinsinsi chanu n'chotani?

Mlimi Ndimadalira ulimi wamthirira ndi wamleranthaka. M'munda mwanga ndimathira manyowa aziweto ndi kuyala mapesi kuti muzikhala chonde. Mu ulimi wamthirira, ndimapatutsa madzi kumtsinje kudzera m'ngalande zimene ndidakumba. Ndimakolola katatu pa chaka. Theka la munda wanga ndimayala mapesi.

- Ndikatero, ndimabzala mbewu
ndipo sindipaliramo ndi khasu koma
ndimangozula zomera zosayenera
mpaka kukolola.
- Mtolankhani Nanga mukakolola mbewuzo
mumachita nazo chiyani?
- Mlimi Ndimasunga zakudya zokwanira
chaka chonse. Zina ndimagulitsa
kumisika yovomerezeka kuti ndipeze
phindu lochuluka.
- Mtolankhani Mungawalangize zotani amene
akutimvera?
- Mlimi Ndikuwalangiza kuti azitsatira
njira zaulimi wamakono. Azibzala
mbewu ndi mvula yoyamba. Amene
ayandikana ndi mtsinje, atha kuchita
ulimi wamthirira. Ndi bwinonso
kumachita ulimi wamleranthaka
chifukwa umaonjezera chonde
m'nthaka.
- Mtolankhani Zikomo kwambiri kuti ndacheza nanu
bwino. Ndikhulupirira kuti omwe anali
kutimvetsera aphunzira zambiri pa
zomwe mwandifotokozerazi.


Kuyankha mafunso

Yankhani mafunso otsatirawa kuchokera m'nhani yomwe mwawerengayi.

- 1 Kodi mlimi watchulidwa m'nhaniyi ndani?
- 2 Perekani mayina a mbewu ziwiri zomwe mlimiyu amalima.
- 3 Tchulani malangizo awiri omwe mlimiyu wapereka kwa omvera.
- 4 N'chifukwa chiyani mu ulimi wamleranthaka amayala mapesi m'munda?
- 5 Fotokozani ubwino woti mtolankhani azicheza ndi alimi.

Ntchito A Kufotokoza zaubwino wa ulimi wamakono

Fotokozani zaubwino wa ulimi wamakono polemba m'mabokosi ali m'munsiwa.



Ntchito B Kuika zizindikiro zam'kalembedwe

Ikani lembo lalikulu, mpumiro, mpatuliro ndi mfunsiro pa malo oyenera m'ziganizo zotsatirazi.

Chitsanzo Kodi iwe waweruka kale

Yankho Kodi iwe waweruka kale?

1 Njala imasowetsa mtendere

2 tapiwa wabwera.

3 Kodi dzina la sukulu yanu ndi chiyani


4 Mumayenda bwanji popita kwanu

5 Ife timakonda kudya zipatso nyama ndi nsima.

MUTU 22 Zikhulupiriro zakale

Dziwani mawu awa

kachisi nsembe vwandamuka kwiya pembedza



Kalekale anthu adali ndi zikhulupiriro zosiyanasiyana zokhudza mvula. Ankakhulupirira kuti mvula siigwa ngati mizimu yakwiya. Mizimu inkakwiya anthu akakhala ndi makhalidwe oipa. Pofuna kuti mizimu ikhululuke, anthu ankathira nsembe m'kachisi kapena pansi pa mtengo wovwandamuka kuti mizimu ikhululuke.

Panthawi yokathira nsembe, amfumu ndiwo ankatsogolera mwambowu. Anthu ankatenga zinthu monga ufa, nyama, thobwa kapena mowa. Ufa ndi nyama ankanyamulira m'nsengwa kapena m'dengu. Thobwa ndi mowa ankanyamulira m'mbiya kapena m'zipanda. Ankalowa m'kachisi ndi kukhazika pansi zinthuzo. Akatero, ankapembedza kwa mizimu yamakolo. Kawirikawiri mvula inkagwa akamachokera kukachisi. Zikatero ancati azimu alandira nsembe yawo.

Masiku ano, zinthu zasintha. Anthu ochita kafukufuku adapeza kuti mvula imagwa yokwanira ngati dera lili ndi mitengo yambiri. Iwo adapezanzo kuti mvula siibwera bwino ngati anthu adula mitengo mwachisawawa. Mitengo imathandiza kuti dera lizilandira mvula yokwanira.

Pofuna kuti mvula izibwera yokwanira, ndi bwino kuti anthu azibzala mitengo yambiri ndi kupewa kuidula mwachisawawa.

Kuyankha mafunso

Yankhani mafunso otsatirawa kuchokera m'nhani mwawerengayi.

- 1 Kodi kale anthu ankakhulupirira kuti mvula inkakanika kugwa chifukwa chiyani?
- 2 Tchulani malo awiri omwe anthu akale ankathirirako nsembe.

- 3 Kodi masiku ano anthu amatani mvula ikasowa?
- 4 Perekani njira ina yosamalira mitengo yomwe siidatchulidwe m'nhaniyi.
- 5 Kodi mukuganiza ndi bwino kuthira nsembe kuti mvula ibwere? Fotokozani maganizo anu.

Ntchito A Kupereka matanthauzo osiyana amawu amodzi

Perekani matanthauzo awiriawiri a mawu otsatirawa.

Chitsanzo chilere

Yankho a mtundu wa njoka
b munda wa mtedza

1 mtengo _____

2 khala _____

3 chitete _____

4 chipere _____

5 phula _____

Ntchito B Kusintha aneni m'nthawi yakale

Sinthani aneni omwe ali ndi mzere kunsi kwawo kuti akhale m'nthawi yakale.

Chitsanzo Iwo apereka ndalama zambiri.

Yankho Iwo adapereka ndalama zambiri.

- 1 Mwana wadya phala.
- 2 Ife tathira ufa m'thumba.
- 3 Mvula yagwa kwambiri.
- 4 Ophunzira ena abwera kusukulu mofulumira.
- 5 Anawo avina bwino.

MUTU 23 Mgwirizano wa njuchi

Dziwani mawu awa

makenjuchi uchi mgwirizano khumudwa



Kalekale m'nkhalango ya Ngongomwa mudali banja la a Njuchi. M'banjali mudali Makenjuchi, Bambo Njuchi, Mayi Njuchi, ana ndi antchito. Banja lonse linkagwira ntchito molimbika.

Chaka china mvula idagwa bwino ndipo mitengo yambiri idali ndi maluwa okongola. Banja la a Njuchi lidagwirizana zopanga uchi ochuluka kuchokera ku maluwawo.

Tsiku lina, Makenjuchi adasonkhanitsa banja lonse. Adauza banjalo kuti liyenera kugawana ntchito zosiyanasiyana zothandiza kupanga uchi. Makenjuchi adalamula antchito kuti azitenga madzi m'maluwa kuti apangire uchi. Makolo ndi ana adawalamula kuti azithandizana kupanga uchi. Onse adavomera ndipo adayamba kugwira ntchito zawo molimbika. Adapanga uchi wambiri ndipo unkayenderera pamalo ponepo.

Munthu wina wodutsa adaona uchiwo ukuyenderera. Munthuyo adatengeka mtima ndipo adaba uchi onse. Nkhaniyi idamupeza Makenjuchi ndipo iye adalondola munthuyo. Adamupeza ataika uchiwo m'mabotolo. Anthu ambiri anali kugula uchiwo.

Makenjuchi ataona zimenezi, zidamuwawa kwambiri. Iye adabwerera ku nkhalango ali wokhumudwa. Atafika, adaitanitsa msonkhano wadzidzidzi. Cholina cha msonkhanowo chidali choti apeze njira zothana ndi mbava ija. Pa msonkhanowo adagwirizana kuti antchito ena akhale asirikali olondera zisa nthawi zonse. Asirikaliwo adawapatsa mphamvu yoti aziluma aliyense wofuna kuba uchi. Kuyambira tsiku limenelo, Njuchi zimathamangitsa


aliyense wodutsa pafupi ndi zisa zawo.

Kuyankha mafunso

- 1 Tchulani dzina la nkhalango yomwe banja la a Njuchi linkakhala.
- 2 N'chifukwa chiyani Makenjuchi adaitanitsa msonkhano wadzidzidzi?
- 3 Kodi munthu yemwe adaba uchi adachita bwino? Perekani maganizo anu.
- 4 N'chifukwa chiyani Njuchi zinkathamangitsa anthu?
- 5 Fotokozani kufunika kogwirizana pogwira ntchito.

Ntchito A Kulemba chimangirizo

Lembani ziganizo zofotokoza zomwe zikuchitika m'zithunzi zotsatirazi. Chiganizo cha chithunzi choyamba chalembedwa kale.



Chitsanzo Bambo ndi Mayi Dzuwa akulima m'dimba.

Ntchito B Kuzindikira afotokozi aumwini

Mfotokozi waumwini amasonyeza umwini wa chinthu.

Tsekani mzere kunsi kwa afotokozi aumwini m'ziganizo zotsatirazi.

Chitsanzo Tadala wanyamula chikwama chake.

Yankho Tadala wanyamula chikwama chake.

- 1 Iye wagula mango athu.
- 2 Mwana wanga walandira mphatso.
- 3 Mbuzi yadya nthochi zako.
- 4 Achimwene akwera njinga yawo.
- 5 Mphaka wake wagwira khoswe wamkulu.

MUTU 24 Ndingathe

Dziwani mawu awa

phulika

mphwayi

ukadaulo

kuthekera



Nanenso ndingathe

Kuulutsa mawu paialis

Kuphunzitsa ndi kusangalatsa anthu

Nyimbo zikuphulika

Nanenso ndingathe
Kuyendetsa galimoto yapamwamba
Kumalo anga antchito kochezu
Poti mphwayi ndilibe

Nanenso ndingathe
Kukhala bwana pandekha
M'sitolo, katundu ali tho!
Ena ntchito nditawalemba

Nanenso ndingathe
Kumanga nyumba yamakono
Moyo wanga utasintha
Poti kuthekera ndili nako

Nanenso ndingathe
Kugwira ntchito mwaukadaulo
Womwe Namalenga adandipatsa
Poti kuthekera ndili nako


Kuyankha mafunso

Yankhani mafunso otsatirawa kuchokera
m'ndakatulo yomwe mwawerengayi.

- 1 Perekani ntchito ziwiri zomwe woyankhula
m'ndakatuloyi angathe kugwira.
- 2 Fotokozani ubwino wodzidalira.
- 3 Tchulani ntchito zapamwamba zomwe mungathe
kugwira.
- 4 Fotokozani kuipa kochita zinthu mwamphwayi?
- 5 Kodi mundakatuloyi mwaphunziramo chiyani?

Ntchito A Kufotokoza zomwe ndingathe kuchita

Lembani zomwe mungathe kuchita m'mabokosi osaleembedwa.



Ntchito B Kutsiriza ziganizo ndi aonjezi amchitidwe

Muongezi wamchitidwe ndi mawu omwe amasonyeza momwe ntchito yachitikira.

Tsirizani ziganizo zotsatirazi ndi aonjezi amchitidwe awa.

**molimbikira
mwaluso**

**mofulumira
mochedwa**

**mosamala
bwino**

Chitsanzo Iye amayenda _____.

Yankho Iye amayenda mofulumira.

1 Mwayi amagwira ntchito _____.

2 Iwo atilandira _____.

3 Ana awa akuimba _____.

4 Madalitso wafika _____ kusukulu.

5 Muzyenda _____ pamsewu.

MUTU 25

Kubwerezza zam'mbuyo
ndi kuyesa ophunzira

Ntchito A Kupereka matanthauzo a zilapi/ ndagi

Pezani matanthauzo a zilapi kuchokera ku mayankho awa.

**lirime
malambe**

**tsitsi
nzimbe**

mtedza

Chitsanzo Namwali alira napenya kwawo.

Yankho mkoko wa nthochi.

- 1 Mbalame yaikira paminga.
- 2 Chiputu zuu, mbewa laka.
- 3 Chimunda uko, zokolola n'kumanja.
- 4 Nkhalamba yaimvi m'mimba.
- 5 Nkhalamba yatengera madzi m'kandodo.

Ntchito B Kugwiritsa ntchito mawu oyenera

Lembani mawu oyenera m'mipata posankha mawu omwe ali m'mikutiramawu.

Chitsanzo Yamikani akudya _____
(asanasambe/asanatsuke) m'manja.

Yankho Yamikani akudya asanasambe m'manja.

- 1 Amayi _____ (akuchapa/akutsuka) mbale.
- 2 Iye wavala _____ (mayala/malaya)
wokongola.
- 3 Ana osamvera _____ (amapanga/amachita)
mphulupulu.
- 4 Ng'ombe _____ (yachita/yapenga) misala.
- 5 Achemwali anga _____ (adakwatira/
adakwatiwa) chaka chatha.

Ntchito C Kutsiriza ziganizo ndi aonjezi

Tsirizani ziganizo zotsatirazi ndi aonjezi awa.

**mwachangu
masana**

**modekha
kutchire**

**pathandala
m'bandakucha**

Chitsanzo Ife tigwira ntchitoyi _____.

Yankho Ife tigwira ntchitoyi **mwachangu**.

1 Kalulu uja wathawira _____.

2 Tambala amalira _____.

3 Amayi anga amayankhula _____.

4 Madalo amakonda kugona _____.

5 Ana ayanika mbale _____.

MUTU 26 Kupempha koyenera

Dziwani mawu awa

pempha

nyonyomala

kondwera

thyola



Mphatso, Mayamiko ndi Madalitso adali adzukulu a Gogo Nasibeko. Mphatso adali mtsikana, pamene Mayamiko ndi Madalitso adali anyamata. Anawa ankakhala ndi a Nasibeko. Ankawalera bwino powaphunzitsa makholidwe oyenera. Gogo Nasibeko ankawalimbikitsa anawa kuti azipereka ulemu kwa

akulu komanso azigwira ntchito molimbikira. Kotero anawa adakula ndi makhalidwe abwino.

Tsiku lina, anawa adafuna kudya nzimbe. Adapita pomwe padali agogo awo. Mwaulemu, Mphatso adagwada pamene Mayamiko ndi Madalitso adanyonyomala.

Ana	<i>Mwaswera bwanji agogo?</i>
Agogo	<i>Ndaswera bwino, kaya inu?</i>
Madalitso	<i>Ifenso taswera bwino agogo.</i>
Mphatso	<i>Agogo, timati tikupempheni.</i>
Agogo	<i>Mukufuna kupempha chiyani ananu?</i>
Mayamiko	<i>Timati tikathyole nzimbe kudimba.</i>
Agogo	<i>Chabwino, pitani. Nzimbe zinakhwima bwino tsopano.</i>
Madalitso	<i>Timaganiza ngati sizinakhwime, agogo.</i>
Agogo	<i>Ayi, zinakhwima ndithu. Mukhoza kukathyola. Ngati gwafa wapsa, mukathyolekonso.</i>
Mphatso	<i>Zikomo kwambiri, agogo.</i>

Ana aja adanyamuka mokondwa kupita kudimba kukathyola nzimbe. Atafika kudimba, adathyola nzimbe ndipo adapeza gwafa atapsa. Mphatso, Mayamiko ndi Madalitso adathyolanso gwafayo.

Atabwerera kunyumba, adathokoza agogo chifukwa chowalola kukathyola nzimbe. Agogowo adakondwera kwambiri kuti anawo adali aulemu.

Kuyankha mafunso

Yankhani mafunso otsatirawa kuchokera m'nhani yomwe mwawerengayi.

- 1 Tchulani dzina la agogo omwe atchulidwa m'nhaniyi?
- 2 Kodi anawa adapempha chiyani kwa agogo?
- 3 N'chifukwa chiyani anawo adakula ndi ulemu?
- 4 Fotokozani ubwino woperekwa ulemu kwa makolo.
- 5 Fotokozani kuipa kosapempha mukafuna zinthu.

Ntchito A Kuchita sewero

Chitani sewero la kupempha koyenera.

Ntchito B Kupanga ziganizo ndi aonjezi anthawi

Muonjezi wanthawi amasonyeza nthawi yochitikira ntchito.

Pangani ziganizo ndi aonjezi anthawi otsatirawa.

Chitsanzo lero


Yankho Alendo aja afika lero.

- 1 dzulo
- 2 mawa
- 3 masana
- 4 usiku
- 5 madzulo

MUTU 27 Zakudya zakasinthasinthia

Dziwani mawu awa

thanzi kasinthasinthia zipatso manga



Mayi Masamba ankagwira ntchito ya unamwino. Iwo adali woyang'anira zaumoyo wathanzi pachipatala cha Kanjazi. Iwo adachita maphunziro azakudya zakasinthasinta kusukulu ya ukachenjede. Mayi Masamba adali katswiri pa ntchito yawo.

Tsiku lina, Mayi Masamba adaphunzitsa odwala za kufunika kwa kudya zakudya zakasinthasinthia. Iwo adati zakudya monga nsima, mpunga ndi mbatata zimapatsa mphamvu. Ndiwo zamasamba monga mpiru, bonongwe, khwanya ndi mnkhwani zimateteza ku matenda ndi kuonjezera magazi. Zipatso monga gwafa, malalanje ndi mapapaya zimatetezanzo ku matenda ndi kuonjezera magazi. Nyama, nsomba ndi nyemba zili m'gulu lomanga thupi.

Wodwala wina adafunsa, "Kodi zakudyazi zilipo magulu angati?" Mayi Masamba adati, "Zakudyazi zilipo magulu asanu ndi limodzi. Pali zakudya zokhutitsa, zamafuta, zanyama, zam'gulu la nyemba, zipatso ndi masamba." Mayiwa adatsimikiziranso wodwalayo kuti akamadya zakasinthasinthia adzakhala ndi moyo wathanzi.

Pomaliza, Mayi Masamba adalimbikitsa odwalawo kuti akatsatire malangizo omwe adawauzawo. Akadzatero, adzakhala anthu athanzi ndipo adzatha kugwira ntchito zotukula madera awo.

Kuyankha mafunso

Yankhani mafunso otsatirawa kuchokera m'nhani yomwe mwawerengayi.

- 1 Kodi Mayi Masamba ankagwira ntchito yanji?
- 2 Tchulani awiri mwa magulu azakudya omwe atchulidwa m'nhaniyi.
- 3 Kodi ndi zakudya ziti zomwe mumakonda?
- 4 Fotokozani ubwino wakudya zakudya zakasinthasinthia.
- 5 Kodi mnzanu amene sakonda kudya ndiwo zamasamba mungamupatse malangizo otani?

Ntchito A Kulemba chimangirizo

Lembani chimangirizo pamutu wa, 'Zakudya zakasinthasinthia' poyankha mafunso awa.

- 1 Kodi magulu azakudya alipo angati?
- 2 Perekani zitsanzo ziwiri m'gulu lililonse la zakudyazo.
- 3 Kodi kwanu mumakonda kudya zakudya za magulu ati?
- 4 Fotokozani ubwino wa zakudya zakasinthasinthia.

Ntchito B Kulemba zizindikiro zam'kalembedwe

Ikani mpumiro, mpatuliro ndi lembo lalikulu
m'ziganizo zotsatirazi.

Pali zakudya zopatsa mphamvu monga nsima
mpunga ndi mbatata. ndiwo zamasamba monga
mpiru bonongwe khwanya ndi mnkhwani zimateteza
ku matenda.

MUTU 28 Kusankha atsogoleri apasukulu

Dziwani mawu awa

mtsogoleri chisankho tanganidwa bata



Lidali tsiku Lachisanu masana pamene Sukulu ya
Masera idachititsa chisankho cha atsogoleri a
ophunzira. Pa tsikuli, mitima ya ophunzira idali
thi, thi, thi, pokonzekera kusankha atsogoleriwo.

Aphunzitsi adatanganidwa kukonzekera momwe akayendetsere chisankhocho.

Belu litalira, ophunzira onse adathamangira pabwalo la zamasewera. 'Chete! Chete!' Wachiwiri kwa mphunzitsi wamkulu adatero pokhazikitsa bata. Ndipo ophunzira onse adakhala chete.

Iye adafotokozango zoyenera kutsata posankha atsogoleriwo. Adafotokoza kuti ophunzira omwe amayenera kuwasankha afunika kukhala olimbikira maphunziro, aulemu, omvera ndi osajomba kusukulu.

Wachiwiri kwa mphunzitsi wamkuluyo adalengeza mayina a anyamata ndi atsikana opikisana pa chisankho. Mayinawo adali omwe ophunzira adaperekira. Iye adanena kuti alembe papepala mayina a omwe ankawafuna kuti akhale atsogoleri.

Kenaka wachiwiri kwa mphunzitsi wamkuluyo adalengeza mayina a opambana. Ophunzira omwe adasankhidwa kukhala atsogoleri adawaitanira kutsogolo kuti ophunzira anzawo awaone komanso awadziwe. Pa udindo ulionse, padasankhidwa mtsikana ndi mnyamata.

Aphunzitsi adalangiza ophunzira omwe adasankhidwa, zoyenera kuchita pa maudindo awo. Mwachitsanzo, adawalangiza kuti azikhala achitsanzo chabwino nthawi zonse. Adawalangizanzo kuti azifika pasukulu mofulumira kuti azitsogolera anzawo posesa pabwalo ndi

kukolopa m'makalasi. Pomaliza, adawalangiza kuti azigwira ntchito yawo mosakondera.

Kuyankha mafunso

Yankhani mafunso otsatirawa kuchokera m'nhani yomwe mwawerengayi.

- 1 Tchulani dzina la sukulu yomwe yatchulidwa m'nhaniyi.
- 2 Kodi ndi makhalidwe ati omwe osankhidwa adayenera kukhala nawo?
- 3 Ndi njira yanji yomwe adatsata pofuna kusankha atsogoleri?
- 4 Fotokozani chomwe chakusangalatsani m'nhaniyi.
- 5 N'chifukwa chiyani kukhala ndi atsogoleri kuli kofunika pasukulu?

Ntchito A Kusanja ziganizo

Sanjani ziganizo zotsatirazi m'ndondomeko yoyenera.

- 1 Pabwalopo, mphunzitsi wamkulu adakhazikitsa bata.
- 2 Patsiku Lachisanu, ophunzira adasankha atsogoleri awo.
- 3 Kenako adalengeza mayina a opikisana.

- 4 Adasankha atsogoleriwo molemba mayina papepala.
- 5 Ophunzira onse adapita pabwalo la zamasewera.

Ntchito B Kuzindikira a lowam'malo

Tsekani mzere kensi kwa a lowam'malo m'ziganizo zotsatirazi.

Chitsanzo Athu ali kunyumba yamalamulo.

Yankho Athu ali kunyumba yamalamulo.

- 1 Iwo apita lero.
- 2 Izi zathyola khola.
- 3 Kodi zako zilipo?
- 4 Inu ndinu olimbikira.
- 5 Tiyeni tikamufunse iyeyo.

MUTU 29 Madandaulo ankhalamba

Dziwani mawu awa

khumbi

mphamvu

mtsiro



Samale mphamvu zatha
Ndine nkhalamba mwanawe
Ndilira chisamaliro chako
Ndateremu ndatopa
Ukandisala masikuache pa

Samale mphamvu zatha
Nkhalambane chakudya patse
Kuti mphamvu ndizipeze
Moyo wanga upitirire
Nzeru ndikugawire

Samale mphamvu zatha
Chikondi chako onetse
Osamba madzi phitsire
Litsiro kuti lichoke
Thupi langa lipepuke

Samale mphamvu za^{tha}
Kakhumbi konzere
Chipupa kulungizire
Mtsiro pansi tsirire
Kuti ndizigona pabwino

Kuyankha mafunso

Yankhani mafunso otsatirawa kuchokera
m'ndakatulo yomwe mwawerengayi.

- 1 Kodi akuyankhula m'ndakatuloyi ndani?
- 2 Tchulani zinthu ziwiri zokha zomwe
woyankhulayu akufuna kuti apatsidwe.
- 3 N'chifukwa chiyani woyankhulayu ayenera
kusamba madzi otentha?
- 4 N'chifukwa chiyani woyankhulayu akudandaula?
- 5 Fotokozani momwe mungathandizire nkhalamba.

Ntchito A Kulemba kalata

Lembani kalata kwa mnzanu yomufotokozena zinthu
zosangalatsa zimene zili pasukulu panu poyankha
mafunso otsatirawa.

- 1 Tchulani dzina la sukulu yanu.
- 2 Sukuluyi imapezeka m'dera liti?
- 3 Tchulani zimene zimakusangalatsani pasukulupo
ndi zifukwa zake.

Ntchito B Kuzindikira aonjezi amalo

Muongezi wamalo ndi mawu amene amatidziwitsa za malo ochitikira ntchito.

Tsekani mzere kensi kwa aonjezi amalo m'ziganizo zotsatirazi.

Chitsanzo Iwo apita kutauni.

Yankho Iwo apita kutauni.

- 1 Nthochizi ikani apa.
- 2 Amayi akupita kuchipatala ndi mwana.
- 3 Ana akusewera kuseri.
- 4 Tinamuona atakhala pampando waukulu.
- 5 Patuma wapita uko.

MUTU 30

Kubwereza zam'mbuyo ndi kuyesa ophunzira

Ntchito A Kugwiritsa ntchito mawu oyenera

Lembani mawu oyenera m'mipata posankha mawu amodzi omwe ali m'mikutiramawu.

- 1 Tiyenera _____ mano tikatha kudya. (kuchapa/kutsuka)
- 2 Ophunzira _____ masewera ampira. (akupanga/akuchita)
- 3 Ndikufuna ndimwe _____. (madzi/mazi)
- 4 Uchi uwu _____. (ukuzuna/ukuwawasa)
- 5 Tengani _____ musese m'nyumba. (sache/tsache)

Ntchito B Kupereka mawu otsutsana m'matanthauzo

Perekani mawu otsutsana m'matanthauzo ndi mawu awa.

Chitsanzo seká

Yankho lira

- 1 msoti
- 2 achimwene
- 3 bwera
- 4 mwayi
- 5 kwera

Ntchito C Kuzindikira aonjezi

Tsekani mzere kensi kwa aonjezi m'ziganizo zotsatirazi.

- 1 Mudzabwere nonse masana.
- 2 Iye sathamanga kwambiri akatopa.
- 3 Tinyade amayenda mofulumira.
- 4 Iye amagwira ntchito mwachangu.
- 5 Ife timalemba bwino.

MUTU 31 Kudzidalira pa chuma

Dziwani mawu awa

zifuyo

khama

khwimbi



Anthu am'mudzi mwa a Chuma adali akhama pochita zinthu. Iwo ankagulitsa zinthu monga zifuyo, ndiwo zammasamba, chimanga, zidebe ndi mipando. Maanja ambiri adali odzidalira pa chuma. Nyumba zamalata zidali ponseponse ndipo anthu am'midzi yoyandikana nawo ankasirira.

Tsiku lina a Kapanda adapita kukafunsira nzeru kwa
Mfumu Chuma.

Mfumu Kapanda

Odi! Odi! Kumpandako!

Mfumu Chuma

Eee! Fikani kon'kuno!

Mfumu Kapanda

Zikomo.

Mfumu Chuma

*Oo! Ndi Mfumu Kapanda kodi?
Khalani pampandopa. Nanga
muli bwanji?*

Mfumu Kapanda

Ndili bwino, kaya inu mfumu?

Mfumu Chuma

*Nanenso ndili bwino. Nanga
mwangotiyendera?*

Mfumu Kapanda

*Ayi. Ndadzera kuti
mundithandize. Ndakhala
ndikusirira momwe mudzi
wanu watukukira. Lero ndati
ndifunsireko nzeru. Anzathu,
mumatani kuti mutukuke
chonchi?*

Mfumu Chuma

*Ha! Ha! Ha! Mwatero? Mwachita
bwino. Ine ndimalimbikitsa
anthu anga kugwira ntchito
zosiyanasiyana. Ndimawalangiza
kuti azitsatira njira zoyenera
zopezera ndi kusungira ndalamu.*

Mfumu Kapanda

*Njira zimenezi ndizo ziti?
Ndikufuna ndidziwe.*

Mfumu Chuma

Njirazo zilipo zambiri.
Mwachitsanzo,
ndimawalimbikitsa kuweta
zifuyo, kulima mbewu
zosiyanasiyana ndi kugwira
ntchito zamanja zosiyanasiyana.

Mfumu Kapanda

Ooo! Ndiye anthu anu amachita
zinthu zambiritu. Nanga
tandiuzakoni njira zosungira
ndalama?

Mfumu Chuma

Pali njira zambiri zosungira
ndalama. Ife m'mudzi muno,
tidasankha njira yosungitsa
ndalama zathu ku mabanki.
Tidayambitsanso bungwe
losungitsa ndi kubwereketsa
ndalama m'mudzi mom'muno.

Mfumu Kapanda

Ndaphunzira zambiri mfumu.
Ndathokoza chifukwa
chondithandiza ndi nzeru.
Zimenezi zikatithandiza
kwambiri.

Amfumu Kapanda adabwerera kwavo.
Adakambirana ndi nduna zaho zomwe
adakaphunzira kwa Mfumu Chuma. Amfumu
Kapanda ndi nduna zaho adagwirizana zoitanitsa
msonkhano. Khwimbi la anthu lidafika kumsonkhano.

Amfumu Kapanda adaphunzitsa anthu ake njira zopezera ndi zosungira ndalamama zoyenera. Pang'ono ndi pang'ono mudzi wa a Kapanda udayamba kutukuka.

Kuyankha mafunso

Yankhani mafunso otsatirawa kuchokera m'nhani yomwe mwawerengayi.

- 1 N'chifukwa chiyani anthu amasirira mudzi wa a Chuma?
- 2 Tchulani njira ziwiri zopezera ndalamama zomwe mwawerenga m'nhaniyi.
- 3 N'chifukwa chiyani Mfumu Kapanda idapita kwa Mfumu Chuma?
- 4 Perekani chifukwa chomwe Mfumu Kapanda adabwerera kunyumba ali wokondwa.
- 5 Fotokozani momwe anthu am'dera lanu amapezera ndalamama.

Ntchito A Kupereka matanthauzo a zilapi

Pezani matanthauzo a zilapi/ndagi posankha mayankho awa.

**nthutumba
chimanga**

**tambala
dzira**

**lamba
bowa**

Chitsanzo Nyumba yanga yopanda khomo.

Yankho dzira

- 1 Alira atadzimenza yekha.
- 2 Amayi tsalani, kumudzi ndipita ndine.
- 3 Nyumba yanga yamzati umodzi.
- 4 Nyama kunja, chikopa m'kati.
- 5 Zungulira uku, tikumane uku.

Ntchito B **Kuzindikira mayina aunyinji**

Dzina launyinji ndi mawu oimira zinthu zapagulu osati chinthu chimodzi.

Tsekani mzere kensi kwa mayina aunyinji m'ziganizo zotsatirazi.

Chitsanzo Upile wanyamula phava la nthochi.

Yankho Upile wanyamula phava la nthochi.

- 1 Enelesi wasenza mtolo wa nzimbe.
- 2 Paulo wadula mkoko wa nthochi.
- 3 Iye waunjika mkuku wa chimanga.
- 4 Atate ali ndi msambi wa ng'ombe.
- 5 Tione wagula mulu wa mango.


MUTU 32 Phindu la ulimi wa ziweto

Dziwani mawu awa

msipu

m'bawa

mkuyu



Mudzi wa Mawoko udali pafupi ndi dambo.
M'mudzimu mudali banja la a Chakhaza. Banjali lidali
ndi ziweto. Ziwetozo zidali zonenepa chifukwa cha
msipu womwe zinkadya.

A Chakhaza adali ndi abusa atatu omwe ankasamalira ziweto zaho. Abusawa ankaonetsetsa kuti ziwetozo zadya mokwanira. Zikakhuta, ankapita nazo kumtsinje wa Dzaone kuti zikamwe. Zikamwa madzi, zinkagona pa mithunzi yam'bawa ndi mkuyu. Mitengoyi idali m'mbali mwa mtsinjewo.

Banja la a Chakhaza linkapindula kwambiri ndi ziweto. Banjali linkapeza manyowa ochuluka kuchokera ku ziwetozo. Manyowawo ankathira m'minda yaho. Izi zinkawathandiza kuti azigula matumba ochepe a fetereza ndipo zokolola zaho zinkakhala zochuluka.

Pabanjali padali pa mwanaalirenji. Banjali linkakwanitsa kugula zovala zabwino. Ana adali athanzi ndipo ankapita kusukulu. Anawo ankawagulira zinthu zofunikira monga njinga zoti azikwera popita kusukulu.

Anthu am'mudzi mwa a Mawoko ankafika pakhomo pa a Chakhaza mwaunyinji kudzagula zinthu zosiyanasiyana. Ena ankagula mazira, nkhuku, mbuzi ndi mkaka wa ng'ombe. Enanso ankafunsa nzeru za momwe angachitire ulimi wa ziweto. Anthu ambiri adayamba kuweta zifuyo. Patapita zaka zochepa, mudzi wa a Mawoko udatukuka kwambiri pa ulimi wa ziweto.


Kuyankha mafunso

Yankhani mafunso otsatirawa kuchokera m'nhani yomwe mwawerengayi.

- 1 Tchulani dzina la mudzi womwe a Chakhaza ankakhala.
- 2 N'chifukwa chiyani abusa ankapita ndi ziweto kumtsinje?
- 3 Kodi Banja la a Chakhaza lidawathandiza bwanji anthu am'mudzi mwa a Mawoko?
- 4 Tchulani mitundu iwiri ya ziweto zomwe mungakonde kuweta ndi zifukwa zake.
- 5 N'chifukwa chiyani anthu am'mudzi mwa a Mawoko ankafunsa nzeru kubanja la a Chakhaza?

Ntchito A Kufotokoza phindu la ulimi wa ziweto

Lembani phindu la ulimi wa ziweto m'mabokosi osaleembedwa. Onani chitsanzo chaperekedwa pa nambala 1 m'munsimu.



Ntchito B Kuzindikira aneni m'ziganizo

Tsekani mzere kunsi kwa aneni m'ziganizo zotsatirazi.

Chitsanzo Ine ndikuwerenga nthano.

Yankho Ine ndikuwerenga nthano.

- 1 Makolo athu adagula ng'ombe zamkaka.
- 2 Iwo alemba buku losangalatsa.
- 3 Galu wathu amauwa kwambiri.
- 4 Amayi akuchapa zovala.
- 5 Delifa sadapite kumudzi.

MUTU 33

Kubwereza zam'mbuyo
ndi kuyesa ophunzira

Ntchito A Kupereka matanthauzo a zilapi

Pezani matanthauzo a zilapi/ndagi posankhapo mayankho awa.

maso
chikhadabo

njala
mapazi

mtedza

- 1 Si nyama, si fupa.
- 2 Bokosi langa lotsekula ndi chala.
- 3 Anyamata awiri achifanifani akuyendera pamodzi.
- 4 Sindinakaone mmene kalowera m'mimba.
- 5 Nkhwangwa yanga mtema patali.

Ntchito B Kupereka mawu ofanana m'matanthauzo

Perekani mawu ofanana m'matanthauzo ndi otsatirawa.

- 1 nkhwere
- 2 mphamvu
- 3 machawi
- 4 yamika
- 5 madeya

Ntchito C Kuzindikira mayina aunyinji

Tsirizani ziganizo zotsatirazi ndi mayina aunyinji awa.

chipukutu
khwimbi

mkoko
mulu

mtolo

- 1 Kumsonkhano kunali _____ la anthu.
- 2 Luka wabweretsa _____ wa nkhuni.
- 3 Uwu ndi _____ wa mchenga.
- 4 Amayi anyamula _____ cha mpiru m'manja.
- 5 Mubweretse _____ wonse wa nthochi.

BUKULI SILOGULITSA

ISBN 978-99960-44-120



9 789996 044120

Published by Malawi Institute of Education